

आकाशवाणी

खास-खास खबरां

1. प्रधानमंत्री नरेन्द्र मोदी हो'रें भारत ते अमरीका बश्कार अंतरिम बपार समझौते दे ढांचे गी इक बड़ी खबर दस्सदे होई आखेया ऐ जे एह भारत-अमरीका सांझेदारी दी मजबूती-विश्वास ते गतिशीलता गी दर्शादा ऐ।
2. प्रधानमंत्री नरेन्द्र मोदी दंडु दिनें दी मलेशिया यात्रा पर अज्ज कुआलालंपुर पुज्जे- उ'नें आखेया जे दौरे दौरान रक्षा ते सुरक्षा सहयोग गी मजबूती देने सनें आर्थिक ते नमियें काहडे सरबन्धि रिश्ते गी तगड़ा बनाने पर ध्यान केन्द्रित कीता जाहग।
3. राष्ट्रपति द्रौपदी मुरमू हो'रें अज्ज छत्तीसगढ़ दे बस्तर मंडल मुख्यालय च बस्तर पांडुन महोत्सव दा उदघाटन कीता।
4. पाकिस्तान दी राजधानी च कल इक शिया मसीत च होए दे आत्म-घाती हमले दी जिम्मेदारी इस्लामिक स्टेट आतंकी संगठन नै लैती ऐ-मराने आहलें दी गिनतरी बधियें 36 होई गेई ऐ।
5. छत्तीसगढ़ च अज्ज 51 माओवादियें थेहार सुट्टियें आत्म-समर्पण करी दिता ऐ।
6. भारतीय क्रिकेट कंटोल बोर्ड नै 19एं बरे कोला हेठली उम्री दा विश्व कप जितने आहली भारतीय टीम लेई साड्डे 7 करोड़ रपे दे ईनाम दी घोषणा कीती ऐ।

<><><><><><><><>

PM- India US

प्रधानमंत्री नरेन्द्र मोदी हो'रें भारत ते अमरीका बश्कार अंतरिम बपार समझौते दे ढांचे गी इक बड़ी खबर दस्सेया ऐ। इक सोशल मीडिया पोस्ट च मोदी हो'रें आखेया जे एह समझौता भारत-अमरीका सांझेदारी दी मजबूती- विश्वास ते गतिशीलता गी दर्शादा ऐ। उ'नें दौनें मुख्य बश्कार सरबन्धे दी मजबूती लेई व्यक्तिगत प्रतिबद्धता लेई अमरीका दे राष्ट्रपति डोनाल्ड ट्रम्प हुंदा आभार प्रगट कीता। मोदी हो'रें अग्वे आखेया जे एह समझौता भारत दे मेहनती करसाने- उद्यमियें, एम.एस.एम.इयें-स्टार्टअपें- मछेरें ते होरनें लोकें लेई तरक्की -खुशहाली दे नमें मौके लेइयें औग ते मेक इन इंडिया आहली पैहल

गी होर मजबूती देग। मोदी हो'रें आखेया जे एहदे नै महिलायें ते नौजवानें लेई बड्डे पैमाने पर कम्म-रोजगार दे मौकें पैदा होगन। प्रधानमंत्री हो'रें आखेया जे भारत ते अमरीका नवाचार गी बढावा देने लेई प्रतिबद्ध न ते एह ढांचा निवेश ते प्रोद्योगिकी सांझेदारी गी होर गैहरा ते मजबूत करोग। मोदी हो'रें अग्गे आखेया जे एह बवस्था लचीली ते भरोसेमंद सप्लाई चेनें गी बी मजबूती देग ते कुल संसारी विकास च बी योगदान देग।

<><><><><><>

India –US Trade

भारत ते अमरीक नै अज्ज घोषणा कीती ऐ जे ओ इक-दुए दे बपार कारोबार गी लाह पुजाने लेई इक अंतरिम समझौते दे तौर तरीके तैह करने तगर पुज्जी गेन। इस बारे भारत ते अमरीका दे सांझे ब्यान गी सांझा करदे होई बपार ते उद्योग मंत्रालय नै आखेया ऐ जे दवै मुख्य दपक्खी बपार समझौते पर व्यापक बचार-बटांदरा करने लेई तयार न- तां जे एहदे च होर बेहतरी ते सखाल तुप्पने दी बत पदरी होई सकै।

<><><><><><>

EAM-India US

विदेशमंत्री डाक्टर एस. जयशंकर हो'रें आखेया ऐ जे भारत ते अमरीका बशकार अंतरिम समझौते कन्नै दोने मुख्यें दे हितें गी फैयदा पुज्जोग। इक सोशल मीडिया पोस्ट च जयशंकर हो'रें आखेया जे एहदे नै भारतीय निर्यातकें गी अमरीका च अपने उत्पाद ते सम्यान बेचने च सखाल होग।

<><><><><><>

Shivraj –India US

राई-बाई ते करसान कल्याण मंत्री शिवराज सिंह चौहान हो'रें भारत-अमरीका बपार समझौते दी सराहना करदे होई आखेया ऐ जे इस समझौते गी तोड़ चाढ़दे होई भारत दे करसानें दे हितें दा पूरा ख्याल रक्खेया गेदा ऐ- उन्दे हितें कन्नै कोई समझौतें नैई ऐ कीता गेदा ते इस समझौते तैहत करसानें गी पूरी सुरक्षा हासल ऐ।

<><><><><><>

Goyal-India US

उद्योग ते बपार मंत्री पीयूष गोयल होरें आखेया ऐ जे भारत -अमरीका अंतरिम बपार समझौते दे तैहत भारतीय निर्यात पर लग्गने आहला 50 प्रतिशत टैरिफ घटियै हून 18 प्रतिशत होई गया ऐ। नमीं दिल्ली च भारत-अमरीका संयुक्त ब्यान पर संवाददाताएं गी जानकारी दिंदे होई गोयल होरें आखेया जे भारत पर चीन- पाकिस्तान-बांगलादेश ते वियतनाम समेत अपने गोआंडी मुख्यें दे मकाबले घट्ट टैरिफ लग्गा ऐ। उ'नें इस गल्लै पर जोर दिता जे एह समझौता देश दे राई-बाई ते डेयरी क्षेत्र दी रक्षा करदा ऐ ते भारत नै अपने करसानें ते कृषि क्षेत्र दे हितें दी पूरी रक्षा कीती ऐ ते एहदे नै कदे कोई समझौता नैई कीता जाई सकदा। उ'नें आखेया जे एहदे नै मसालें- चाह- कॉफी- काजू- एवोकैडो- केला- अम्ब- कीवी ते पपीते जनेए उत्पादें पर अमरीका च कोई टैक्स नैई लग्गो। पीयूष गोयल होरें आखेया जे इस बपार समझौते दा देश दे सब्भनैं क्षेत्रें च सुआगत कीता गेदा ऐ।

<><><><><><>

PM -Malaysia Tour

प्रधानमंत्री नरेन्द्र मोदी होर द'उं दिनें दी सरकारी जातरा पर मलेशिया दी राजधानी कुआलालंपुर पुज्जी गेदे न। मलेशिया पुज्जने पर प्रधानमंत्री हुंदा उत्थे निग्गा सुआगत कीता गेआ। एह जातरा नेह ऐसे महत्वपूर्ण समें पर होआ करदी ऐ जिसलै भारत ते मलेशिया 2024 च उन्नत व्यापक रणनीतिक सांझ-भ्याली दे तैहत अपने सरबंधें गी होर मजबूत करा करदे न। एह प्रधानमंत्री मोदी हुंदी मलेशिया दी त्रीस अधिकारिक यात्रा ऐ। मलेशिया लेई रवाना होने शा पैहले अपने बयान च प्रधानमंत्री होरें आखेआ जे मलेशिया दे प्रधानमंत्री अनवर इब्राहिम हुंदे कन्नै चर्चा च रक्षा ते सुरक्षा सहयोग गी मजबूती देने सने आर्थिक ते नमिएं काहडें सरबन्धी रिश्तें गी तगड़ा बनाने ते दपकखी हितें कन्नै जुड़े दे नमें उभरदे खेतरें च सहयोग दा विस्तार करने पर ध्यान केंद्रित कीता जाहग। प्रधानमंत्री मोदी अज्ज संझां कुआलालंपुर च “सेलामत दातंग मोदी जी” शीर्षक कन्नै आयोजित इक सामुदायिक सुआगत समारोह च शामिल होआ करदे न। प्रधानमंत्री होरें भारती समुदास दी भूमिका पर लोस पांदे होई आखेआ ऐ जे प्रवासी भारती समुदास, दौनें मुख्यें बशकार इक जीवंत पुल दा कम्म करदा ऐ ते उंदी ऐतिहासिक मित्तरी दा इक मजबूत थम्म बने दा ऐ। दौनें मुख्यें बशकार डेलीगेशन स्तरै दी गल्लबात

ते दपक्खी व्यक्तिगत बैठकां कल होडन जिंदे च केई समझौता जापने पर दस्तखत होने दी मेद ऐ।

<><><><><><><>

Prez- Chhatisgarh

राष्ट्रपति द्रौपदी मुर्मू होरें छत्तीसगढ़ दे बस्तर मंडल मुख्यालय जगदलपुर च अज्ज बस्तर पाडुम महोत्सव दा उदघाटन कीता। कार्यक्रम गी सम्बोधित करदे होई राष्ट्रपति होरें आखेया जे बस्तर दे लोक जीवन गी इक उमंग ते उत्साह आंगर जीन्दे न। उने गलाया जे बस्तर पाडुम महोत्सव राएं देश ते विश्व गी बस्तर क्षेत्र दी समृद्ध सगगोसार आदिवासी संस्कृति दी झलक दिक्खने गी लब्बै करदी ऐ। राष्ट्रपति होरें आखेया जे बस्तर क्षेत्र पिछले 4 दहाके थमां माओवाद सवां प्रभावत रेहा ऐ। उने आखेया जे एहदे नै आदिवासी समुदाय- नौजवान ते दलित वर्ग सब्भने शा मता प्रभावत होआ। राष्ट्रपति होरें आखेया जे माओवादी हिंसा दे खलाफ सरकार दी फैसलाकुन कारवाई कन्ने इस इलाके च पिछले केई बरे थमां बने दा असुरक्षा ते बेबसाही आहला माहौल खत्म होआ करदा ऐ। राष्ट्रपति होरें आखेया जे माओवाद कन्ने जुड़े दे बड़ी बद्द गिनतरी च लोक हिंसा दी बत्त छुड़ियै समाज च मुखधारा च शामिल होआ करदे न। उने आखेया जे सरकार आत्म-समर्पण करने आहलें माओवादिये दी बा-अबादकारी लेई केई विकास ते कल्याणकारी योजनां लागू कीतियां न। इस मौके पर छत्तीसगढ़ दे राज्यपाल रामेन डेका-मुखमन्त्री विष्णु देव साय ते केन्द्री राज्यमन्त्री तोखन साहू बी मजूद हे। एह महोत्सव 9 फरवरी तगर चलोग।

<><><><><><><>

HM Devp. Meeting

केन्द्री गृहमन्त्री अमित शाह होरें जम्मू-कश्मीर च विकास परियोजनाएं च हासल प्रगति दा जायजा लैने लेई इक उच्ची सतह दी बैठक दी प्रधानता कीती- जिस दरान प्रदेश च महत्वपूर्ण ढांचागत कम्में ते केन्द्र सरकार आसेया चलाई जा'रदी परियोजनाएं दी अमलावरी बक्खी चेचा गौर कीता गया। गृहमन्त्री होरें परियोजनाएं स्हाबै अमल-आवरी दा जायजा लैता ते विकास प्रोजेक्टें गी बेल्ले सिर सबूरा करने दे निर्देश जारी कीते। उने आखेया जे रास-पूँजी- उद्योग- खेडें ते ढांचागत विकास दे खेतरे च पिछले इक दहाके दरान होए दे विकास गी होर तेज करना ते जम्मू-कश्मीर गी मता विकसित

बनाना- उंदी सरकार दी प्राथमिकता ऐ। लैफ्टिनेंट गवर्नर मनोज सिन्हा- मुखमंत्रि उमर अब्दुल्ला- केन्द्री गृह सचिव गोविंद मोहन- मुख सचिव अटल डुल्लु ते जम्मू-कश्मीर पुलसा दे डरेक्टर जनरल नलिन प्रभात हुं दे सनें होरनें बी केइये वरिष्ठ अधिकारिये इस बैठका च हिस्सा लैता। मगरा गृहमंत्रि शाह होर रायपुर- छत्तीसगढ़ लेई खाना होई गे।

<><><><><><>

Chhatisgarh Surrender

छत्तीसगढ़ दे बस्तर मंडल दे बीजापुर ते सुकमा जिले च अज्ज 51 माओवादिये थेहार सुट्टिये अपने-आपे गी कनून दे हवाले करी दिता। इनें माओवादिये पर इक करोड़ 61 लख रपे दा इनाम घोषत हा। बीजापुर जिले च 30 माओवादिये कार्जकर्ताएं हिंसा दी बत छुड़िये समाज दी मुखधारा च शामिल होने दा फैसला लैता ऐ ते इंदे च 20 महिलां माओवादी बी शामिल न- जिंदे पर 85 लख रपे दा इनाम रखेया गेदा हा। इनें पुलस ते सी.आर.पी.एफ दे बड़े अधिकारिये दे सामने आत्म-समर्पण कीता ऐ। तोंआई सुकमा जिले च 21 माओवादिये बी थेहार सुट्टिये मुखधारा च शामिल होने दा फैसला लैता ऐ- जिंदे पर 76 लख रपे दा इनाम हा। आत्म-समर्पण दे दौरान माओवादिये बस्तर रेंज दे पुलस महानिरीक्षक सुंदर राज पी.- सुकमा दे पुलस अध्यक्ष किरण चव्हान ते सी.आर.पी.एफ दे उप-महानिदेशक आनंद सिंह राजपुरोहित हुं दे सामने ए.के-47 रफलां- एस.एल.आर ते बैरल ग्रेनेड लांचरें समेत कई ऑटोमैटिक थेहार सौंपिये अपने-आपे गी कनून दे हवाले करी दिता।

<><><><><><>

Army Chief -Poonch

सेना प्रमुख जनरल उपेन्द्र द्रिवेदी होरे अज्ज पुंछ दा दौरा लाया ते सेना द अधिकारिये ते साबका फौजिये कन्ने मलाटी कीती- जिंदे Ordinary कैप्टन परवेज अहमद हुंदा परोआर बी शामिल ऐ। उनें आतंक-रोधी ग्रीड ते कारवाइये सरबन्धी तयारिये दी समीक्षा करदे होई सतर्कता बरतने ते लोकें पर केन्द्रित रौंह गी अपनाने पर जोर पाया। सेना दे कमांडर होरे जनरल द्रिवेदी होरे गी सुरक्षा हालात बारे जानकारी दिती ते जोआनें दे पेशेवराना खेये दी सराहना कीती। अपने दौरे दौरान सेना प्रमुख होरे फिल्ड कमांडरें-साबका फौजिये ते मकामी पुलस अधिकारिये कन्ने गल्लबात कीती ते सुरक्षाबले

ते सिविल अधिकारियें बशकार तालमेल दी जरूरत पर जोर पाया। उ'नें इलाके च सुरक्षा हालात दा जायजा लैने लेई नियंत्रण रेखा आले इलाकें पर डोआरी बी भारी।

<><><><><><>

Islamic State

पाकिस्तान च कल राजधानी इस्लामाद च इक शिया मसीतें ते इमाम बरगाह पर होए दे आत्मघाती हमले च मरोने आहलें दी गिनतरी बधियै 36 तगर पुज्जी गई ऐ। शहजाद टाऊन इलाके च स्थित तरलाई इमामबाडा पर कीते गेदे इस हमले दी जिम्मेदारी इस्लामिक स्टेट आतंकी गुट नै लैती ऐ- जेहदे च कोई 170 कोला मते लोक घायल बी होए देन। हमले दी जिम्मेदारी इस्लामिक स्टेट नै टेलीग्राम चैनल पर लैती ऐ। इस आतंकी गुट नै इक फोटू बी जारी कीता ऐ जेहदे च हमलावर इक बंदूक फगड़ियै खड़ोते दा ऐ- जेहदा नां सैफउल्लाह अंसारी दस्सेया गेदा ऐ। उया फोटू च अंसारी दा मूंह नकाब कन्नै खटोए दा ऐ। 2008 च पाकिस्तान दी राजधानी च मोरिओट होटल च होए दे आतंकी हमले दे बाद एह अजें धोड़ी दा सब्भनैं शा खतरनाक आतंकी हमला दस्सेया जा'रदा ऐ।

<><><><><><>

BCCI Award

भारतीय क्रिकेट कंट्रोल बोर्ड BCCI नै 19एं बरे कोला हेठली उम्मी दा विश्व कप जितने आहली भारतीय टीम गी नकद इनाम देने दी घोषणा कीती ऐ। BCCI दे सचिव देवाजीत सैकिया होरें इस बारे जानकारी सांझी करदे होई आखेया जे भारत नै इंग्लैंड गी रहाड़यै ICC अंडर-19 क्रिकेट विश्व कप जितने दे बाद पूरा देश खुश ऐ ते असें इस टीम लेई साड्डे 7 करोड़ रपे दे नकद इनाम दी घोषणा कीती ऐ। ध्यानजोग ऐ जे कल चैम्पियनशीप दे फाइनल च भारत नै इंग्लैंड गी 100 रन्ज कन्नै रहाड़यै 6मी बारी अंडर-19 विश्व कप अपने नां कीता ऐ।

<><><><><><>

Jitendra Singh PC

केंद्री विज्ञान ते प्रौद्योगिकी ते धरत विज्ञान मैहकमें दे केन्द्री मंत्री डॉ. जितेंद्र सिंह होरें आखेआ ऐ जे विकसित भारत 2047 दे लक्ष्य गी हासल करने लेई हर नागरिक दी

भागीदारी ते सरकार ते लोकें बशकार मजबूत सांझेदारी दी लोड़ ऐ। ओह अज्ज विजयवाड़ा च भारती जनता पार्टी दी आंध्र प्रदेश इकाई दे विकसित भारत बजट 2026-27 विशे पर संवाददाताएं गी संबोधित करा'रदे हे। डॉक्टर जितेंद्र सिंह होरें आखेआ जे भारत हुन ऐसा देश बनी गेआ ऐ जेहड़ा वैश्विक समर्थन चांहदा हा, पर हुन दुनिया ओहदी बक्खी दिक्खा करदी ऐ। उ'नें आखेआ जे सरकार स्वदेशी तकनीकें, शोध ते नमिएं काहडें गी बढ़ावा देइयै आत्मनिर्भर भारत बनाने बक्खी चेचा ध्यान देआ करदी ऐ। विज्ञान ते अंतरिक्ष दे बारे चर्चा करदे होई श्री सिंह होरें आखेआ जे भारत दा लक्ष्य 2040 तगर इक भारती अंतरिक्ष यात्री गी चंद्रमा पर भेजना ऐ। इस लक्ष्य गी उ'नें राश्ट्री गौरव ते वैज्ञानिक शक्ति लेई इक संगे-मील करार दिता। उ'नें देशे दी पैहली स्वदेशी एंटीबायोटिक दवाई दे विकास पर बी लोऽ पाई ते आखेआ जे एह भारत दी बंधदी शोध सरबन्धी समर्थ गी दर्शादा ऐ ते साह सरबन्धी गंभीर बमारियें दे इलाज च मदाद करग। राश्ट्री सुरक्षा दे विशे बारे उ'नें आखेआ जे प्रधानमंत्री नरेंद्र मोदी व्यक्तिगत रूप कन्नै प्रमुख रक्षा मामलें दी दिक्खरिक्ख करदे न ते नतीजाकुन नेतृत्व प्रदान करदे न। उ'नें आखेआ जे शासन च तकनीकें दी शुरुआत कन्नै सार्वजनिक सेवाएं दी बंड च पारदर्शिता ते गति च सुधार होआ ऐ, ते एहदे च डिजिटल इंडिया ने इक प्रमुख भूमिका नभाई ऐ।

<><><><><><><>

Murugun Budget

सूचना ते प्रसारण राज्यमंत्री एल. मुरुगन होरें आखेया ऐ जे 2026-27 बरे दा आम बजट देसै दे सकल घरेलू उत्पाद ते उत्पादन गी बढ़ावा देने- बुनियादी ढांचे गी मजबूत करने- गरीबें ते दबोए-लतड़ोए दे जीवन स्तरें गी उबड़ा चुक्कने- नौजवानें दे सशक्तिकरण ते महिलायें दे नेतृत्व च विकास गी बढ़ावा देने पर केन्द्रित ऐ। पुदुचेरी च इक कार्यक्रम दौरान उ'नें आखेया जे बजट च नौजवानें गी केन्द्र च रखेया गेदा ऐ ते उन्दे विकास ते सशक्तिकरण बक्खी मता ध्यान दिता जा रदा ऐ। उ'नें आखेया जे बजट दा उद्देश्य राष्ट्र दे विकास गी अगले स्तर तगर लेई जाना ऐ। डाक्टर मुरुगुण होरें आखेया जे 10 जहार करोड़ रपे दी बंड आहली बायो-फार्मा शक्ति योजना कन्नै पुदुचेरी गी मता फैयदा पुज्जोग- जेहड़ी बिजन मार्क आहलियां जेनरिक दोआइयां बड्डे पैमाने पर तयार करने लेई जानेया जंदा ऐ। डाक्टर मुरुगुण होरें आखेया जे सेमीकंडक्टर मिशन दे दुए गेड़ ते Electronics Components Manufacturing योजना जनेइयें

पैहलकदमियें कन्नै बी केन्द्र शासत प्रदेश गी कम्म-रोजागर दे मौके पैदा होने कन्नै फैयदा पुज्जोग।

<><><><><><>

Mohol –Students

सहकारिता राज्यमंत्री मुरलीधर मोहोल होरें विद्यार्थियें गी सहकार से समृद्धि दा लक्ष लेइयै अगड़े बधने पर ध्यान देने लेई प्रेरत कीता ऐ। अज्ज पुणे च वैकुंठ महता नैशनल इंस्टीच्यूट ऑफ कोआपरेटिव मैनेजमेंट दे दीक्षांत समारोह गी सम्बोधित करदे होई- उनें 14 राज्यें दे 95 विद्यार्थियें गी डिप्लोमा प्रदान कीते ते सहकारी बपार मॉडल गी समझने ते रोजगार दे रस्ते तुप्पने पर जोर दिता।

<><><><><><>

UP Highway Accident

उत्तर-प्रदेश च अज्ज बड्डलै जमुना एक्सप्रेस-वे पर इक कंटेनर ट्रक दी बस कन्नै टक्कर च 6 जनें दी मौत होई गई ते 3 दुए घायल होआ गेन। हादसा उसलै पेश आया जिसलै नोएडा थमां कानपुर दे रसूलबाद जा'रदी इक बस एक्सप्रेस-वे पर खड़ी ही जिसलै पिच्छुआ आ'रदे इक ट्रक नै बस गी टक्कर मारी दिती ते बस दे अग्गे खड़ोते दे लोक एहदे लवेटे च आई गे। मथुरा दे एस.एस.पी श्लोक कुमार होरें जानकारी दिती जे 6 जनें दी मौके पर गै मौत होई गई। घायलें गी जिला अस्पताल च भर्ती कराया गया ऐ- जिंदी हालत चिंता आहली दस्सी जा रदी ऐ।

<><><><><><>